

UVODNIK

UVODNIK

Sabor Islamske zajednice je na posljednjoj redovnoj sjednici donio odluku o pokretanju procedure za izmjenu i dopunu Ustava Islamske zajednice. Imenovana je saborska komisija sa zadatkom da u okviru ustavnih ovlaštenja provede proceduru prijedloga amandmana, provođenja javne rasprave i formuliranja konačnih rješenja izmjene i dopune Ustava koja će predložiti Saboru na narednom zasjedanju. Saborskoj komisiji je postavljen je rok za izvršenje ovog zadatka - 31. mart 2012. godine. Ustavno-pravna komisija Sabora Islamske zajednice izradila je nacrt amandmana na Ustav Islamske zajednice i ponudila ga na javnu raspravu 31. januara 2012. godine. Predviđeno vrijeme za javnu raspravu je 30 dana. Glavni odbor Udruženja ilmije je organizirao javnu raspravu o nacrtu amandmana na Ustav Islamske zajednice na nivou okružnih odbora. Prikupljajući prijedloge, primjedbe i sugestije na ponuđeni nacrt amandmana Glavni odbor je odlučio da javnu raspravu u okviru Udruženja ilmije završi jednodnevnim okruglim stolom o temi "Ustavna pozicija imama". Uvodničari na pomenutom okruglom stolu bili su profesor dr. Hilmo Neimarlija, generalni sekretar Rijasetu islamske zajednice Muhamed ef. Salkić i sekretar sarajevskog medžlisa Esad ef. Karahmet. Kao učesnici na okrugli sto pozvani su članovi Glavnog odbora, predsjednici okružnih odbora Udruženja ilmije, kao i trinaest imama, članova Sabora Islamske zajednice. Na okrugli sto odazvalo se 22 pozvana učesnika.

Diskusija se odvijala prije svega u pravcu osiguranja ustavnog osnova za bolju pravnu i materijalnu poziciju imama u okviru ukupne organizacije Islamske zajednice. Poseban interes učesnika pokazan je za promjenu Ustava u dijelu koji tretira učešće uleme u predstavničkim tijelima Islamske zajednice (Izvršni odbora medžlisa i Sabor Islamske zajednice). Udruženje Ilmije ima nepodijeljen stav da 1/3 mandata u predstavničkim tijelima Islamske zajednice pripada ulemi, odnosno nosiocima vjerskog autoriteta unutar Islamske zajednice. Ovo bi se formalno moglo osigurati tako što bi se ove pozicije rezervirale za nosioce Murasele, kao simbola legitimiteta nosioca vjerskog autoriteta Islamske zajednice. U *Novom Muallimu* imate prilike pročitati uvodna izlaganja sa pomenutog okruglog stola, te komentar Nacrta amandmana na Ustav Islamske zajednice u Bosni i Hercegovini dr. Amira Karića. Izlaganje Muhamed ef. Salkića nismo uvrstili, s obzirom da je njegov tekst o ovoj temi skoro u identičnom obliku objavljen u jednom ranijem izdanju našeg časopisa.

Meho ŠLJIVO